

Léng-gán Khòaⁿ “E” Sî-tāi ê Gín-á

Oñg Gē-jû


Chòe-kîn phah-khui tiān-sī á-sī pò-chóa, jip-bák só khòaⁿ, só thiaⁿ-tiòh..ê, m̄-sī chheng siàu-liân chū-sat, chiū-sī in khì sat-jîn, chhin-chhiūⁿ sèⁿ-miā tī chit-tīn siàu-liân gín-á ê bák-chiu--nih, sī bô sím-mih kè-tát..ê, ē-tit-thang sùi-piān húi-tiāu, chit-tiám-á tiòh m̄-chai ài tinsioh pē-bú só siúⁿ-sù hō in ê chit-hūn pó-kùi lé-bút.

Hiān-chāi ê gín-á, lán lóng chheng-ho in sī “E” sî-tāi..ê, in ê siūⁿ-hoat chiân-ōe, chòe-hoat chiân-ōe, sî-siōng ē chòe chhut hō lâng liāu-sióng bōe kàu ê tāi-chì, “phe-chhia, chàm pub, chiāh tòk-phín, chiāh iô-thâu-ôan”. Che khòaⁿ tī góa chit ê chòe lāu-su, í-kip lāu-bú ê sim-lāi, sī thòng-khór koh sim-thiàⁿ, m̄-chai chit-má chòe pē-bú..ê, kiám ū chīn tiòh in chòe sī-tōa-lâng ê chek-jīm--bô?

Lán chòe pē-bú, m̄-sī kan-ta thàn-chîⁿ hō gín-á chiāh-hó, chhēng-hó nā-tiāⁿ. Kì-jîan seⁿ.in, chiū ài ū gī-bū lâi kàu-iòk..in, sî-siōng koan-sim..in, chhin-chhiūⁿ hiah ê phe-chhia-chòk, saⁿ-kiⁿ pòaⁿ-mî koh tī góa-bīn teh lōa-lōa-sô, kiám-kóng chòe pē-bú..ê, lóng m̄-chai gín-á í-keng chiah òaⁿ iáu bōe tíg--lâi, chin-chiàⁿ sī chiám-jiân hiah bô êng--leh? Kiám-kóng gín-á teh chò sím-mih lóng bōe kā i koan- sim?

Chêng chit chām, kap góa ê sian-siⁿ teh khai-káng, kóng tiòh hiān-chāi ê gín-á, ū ê lóng kan-ta chai-iáⁿ beh thák-chheh, m̄-chai ài óah-iōng in só óh--tiòh ê tì-sek. Iáu ē kì--tit, ū chit ūi hák-chiá bat kóng, “Lán lâng ài ū saⁿ ê Q, IQ, EQ, kap CQ.” Iā chiū sī, tì-hūi, chêng-sū ê khòng-chè(che iā-sī it-poaⁿ lâng siōng khiàm-khoat..ê), koh-chài ū chhòng-chō-lék . Oát-thâu khòaⁿ māi--leh, lán ū jōa chòe ê lâng chò ê kàu, iû-kî sī chêng-sū ê kóan-lí . Chit ê sî-tāi ê gín-á nā-sī ū put-bóan ê só-chāi, chiū sī êng pòk-lék lâi kái-koat tāi-chì, bōe-hiáu êng thâu-niáu kap khòng-chè ka-kī ê chêng-sū, koh tûi sèⁿ-miā ê kè-tát-koan oan-khiau, bōe chun-tiōng pât-lâng ê khôan-lī, óng-óng só chō-sêng sī chit-chhut koh chit-chhut ê pi-kiòk, kàu hit sî chiah hiō-hóe, iáh í-keng bōe-hù--ah.

Kî-sit che nā-sī beh kòai gín-á, mā bō kong-pêng. Lán tōa-lâng kiám ū chò hó ê bô-iūⁿ hō lán ê gín-á khòaⁿ, lán kiám ū sî-siông hō gín-á kám-kak tiōh chhù ê un-lóan, lán kiám ū kap gín-á chhin-chhiūⁿ pêng-iú it-poaⁿ lâi teh ko-thong, lán kiám ū chè-chō ap-lék hō gín-á, hō in siūⁿ beh tō-pī, che chióng-chióng ê būn-tê, lán chò lâng pē-bú..ê, kiám ū iōng-sim lâi kiám-thó--leh?



Lán ê gín-á óah tī chit ê káng-kiù bîn-chú ê sî-tāi, khiok sī m̄-chai beh hó hó lâi pá-ak che tek-lâi put-īⁿ ê bîn-chú, chin-chiàⁿ sī chiong ka-kī ê khòai-lòk kiàn-tiòk tī pát-lâng ê thòng-khór téng-bīn, kun-pún tiōh lóng bōe-hiáu beh chun-tiōng pát-lâng ê khôan-lī, chit ê sè-kài chhin-chhiūⁿ sī in..ê, in siōng kài tōa. Khòaⁿ tī góa chòe lāu-su ê bák--nih, sim sī jú lâi jú hân, mā jú lâi jú kín-sīn, in-ūi góan sī khiā tī kàu-iòk tē-it-sòaⁿ ê lâng, ài hō gín-á ū chit ê hó bô-iūⁿ, hi-bāng in ê saⁿ ê “Q”, chòe-chiò ài chò kàu chai-iáⁿ ka-kī só chò ê tāi-chì, só kóng ê ōe-gí,í-kip chêng-sū ê kóan-lí, ē-tit-thang tûi ka-kī hū-cheek, koh tûi pē-bú ū chít-ê kau-tài.

